



**VENDIM**

***Nr. 123 Datë 25.11.2011***

**PËR  
DISA SHITESA DHE NDRYSHIME NË RREGULLAT E ALOKIMIT TË  
KAPACITETEVE TË INTERKONJEKSIONEVE**

Në mbështetje të nenit 9, të Ligjit nr.9072, datë 22.05.2003, “Për Sektorin e Energjisë Elektrike”, të ndryshuar, Kapitullit 11, të Rregullave të Alokimit të Kapaciteteve të Interkonjeksioneve, miratuar me vendimin nr.13, datë 22.02.2011 të Bordit të Komisionerëve të ERE-s dhe nenit 26 të Rregullave të Praktikës dhe Proçedurave të ERE-s, miratuar me vendimin nr. 21, datë 18.03.2009, të Bordit të Komisionerëve të ERE-s, Bordi i Komisionereve të ERE-s në mbledhjen e tij të datës 25.11.2011, mbasi shqyrtoi shkresat e shoqërisë OST sh.a nr.2033 Port., datë 25.07.2011 dhe nr. 2110 Port., datë 29.07.2011, shkresat e KESH Sh.a dhe Cez Shpërndarje Sh.a, përkatësisht me nr. 3923 Prot, date 17.08.2011 dhe nr. 4151/1 Prot date 18.08.2011, dhe shkresat e AEES nr. 28 date 05.09.2011, dhe nr. 27 date 31.08.2011, në lidhje me “Rregullat për alokimin e kapaciteteve të interkonjeksioneve”, si dhe relacionin e Drejtorisë Juridike dhe Mbrojtjes së Konsumatorit dhe Drejtorisë së Licensimit dhe Monitorimit të Tregut,

**Konstaton se:**

- Për kërkesën e OST sh.a për të rishikuar Rregullat e Alokimit të Kapaciteteve të Interkonjeksionit për shkak të pamundësisë së kryerjes së Ankandëve Ditore për alokimin e të drejtës së përdorimit të kapacitetit disponibel të interkonjeksionit, për shkak të mos disponimit të platformës elektronike (Softin) për Menaxhimin e Tregut, Bordi i Komisionerëve vëren se periudha kohore në të cilën mbahen ankandë ditore është shumë e shkurtër nga ora 13:51 deri në orën 14:30, si të tillë problemi kryesor qëndron në mungesën e softit të OST sh.a për të kryer këto ankande.

- Për kërkesat e KESH Sh.a dhe Cez Shpërndarje Sh.a, përkatësisht me nr. 3923 Prot, datë 17.08.2011 dhe nr. 4151/1 Prot datë 18.08.2011, për rishikimin e Rregullave për alokimin e kapaciteteve të interkonjeksioneve me qëllim zgjatjen e periudhës tranzitore deri në 31.12.2012, bazuar në argumentimet si më poshtë:

Argumentime të Cez Shpërndarje sh.a:

- Sigurimi i detyrimit të shpërndarësit të energjisë për të importuar lirshëm energjinë elektrike për humbjet në maksimumin e garantuar të kapaciteteve të interkonjeksionit pa asnjë kosto shtese
- CEZ Shpërndarje ka hapur tenderin vjetor me të drejta të siguruara dhe mendon se heqja e kësaj të drejte mund të çojë në rritjen e çmimit të blerjes së energjisë elektrike dhe për pasojë do të çonte në anulimin e tenderit.
- Cez Shpërndarje konsideron si risk dhe mundet që nga kompanitë pjesëmarrëse në ankandin e kapaciteteve të blejnë ato dhe të bllokojnë pjesëmarrësit e tjerë të mundshëm fitues.

Kërkesa e KESH sh.a bazohet në ndryshimet që kanë ndodhur nga koha e miratimit të Rregullave të Alokimit të Kapaciteteve të Interkonjeksionit e deri më tani dhe konkretisht sipas KESH sh.a:

- Koha kur u miratuan rregullat i korrespondonte një cikli të mirë hidrik ndërkohë tani ka nisur një cikël i thate hidrik
- Eksperienca e deritanishme e prokurimeve të KESH sh.a ka treguar se ka me shumë konkurrence kur ofertohej me të drejta të siguruara nga KESH sh.a.

Në lidhje me këto argumente të CEZ Shpërndarje, apo të KESH sh.a theksojmë se Rregullat e Alokimit të kapaciteteve janë miratuar me datë 22.02.2011, dhe nuk ka kuptim që CEZ Shpërndarje të hap tenderin me të drejta të siguruara, kur prej kohësh është në dijeni të mos pasjes së këtyre të drejtave pas datës 31.12.2011. Për sa i përket riskut potencial të bllokimit të kapaciteteve nga pjesëmarrës të tjerë, sqarojmë se CEZ Shpërndarje sikurse çdo pjesëmarrës i tregut përfshirë edhe KESH sh.a është i lirë të marrë pjesë në këto ankande dhe të sigurojë kështu kapacitetet e nevojshme. Po ashtu, lidhur me këtë shqetësim të bllokimit të kapaciteteve, në rregullore është parashikuar në kapitullin VII, paragrafi 4, se e drejta e përdorimit të kapacitetit ndërkufitar ekzekutohet në baze të principit përdorë ose humbe. Dhe me tej në paragrafin 7, përcaktohet se në rast se

zotëruesi nuk e përdor kapacitetin e deklaruar tek OST, atëherë ai nuk do të lejohet të marre pjesë në ankandin e muajit pasardhës. Në paragrafin 8 përcaktohet se në rast se zotëruesi i kapacitetit në mënyrë sistematike nuk e përdor kapacitetin e deklaruar tek OST, atëherë ai nuk do të lejohet të marre pjesë në ankandet e 6 muajve pasardhës. Nga ana tjetër nëse do të pranoheshin argumentet e KESH sh.a apo edhe CEZ Shpërndarje do të thotë që këto të drejta të siguruara të aplikohen gjithmonë dhe jo për periudha tranzitore.

Për gjithë sa më sipër Bordi i Komisionerëve

### Vendosi:

1. Në Rregullat e Alokimit të Kapaciteteve të Interkonjeksioneve të miratuar me Vendimin nr. 13 datë 22.02.2011, bëhet ndryshimi si më poshtë:  
1.1 –Në fund të paragrafit të katërt të kapitullit 1 “HYRJJE DHE DISPOZITA TË PËRGJITHSHME” të Rregullave të Alokimit të Kapaciteteve të Interkonjeksionit, shtohet paragrafi me përmbajtjen:  
***“Në lidhje me ankandin ditor të alokimit të kapaciteteve të interkonjeksionit nga secili drejtim, shoqëria OST sh.a në mungesë të platformes elektronik (softit) por jo me vone se data 31 Mars 2012, do të ofroje kapacitet ditore për të gjithë pjesëmarrësit e tregut në mënyrë proporcionale sipas kërkesave . Menjëherë pas sigurimit të platformës elektronike (Softit), gjatë periudhës tranzitore, OST sh.a duhet të njoftojë ERE-n”. OST të parashikoj në planin e investimeve për vitin 2012 fondin për realizimin e prokurimit dhe vendosjes në punë të softit brenda afatit të vendosur në këto dispozite.***
2. Duke filluar nga data 1 janar 2012 shfuqizohen të gjitha të drejtat e rezervuara. OST nuk mund të bëjë alokim kapacitetesh mbi baza prioritare (të drejta të siguruara).
3. Për një periudhë tranzitore por jo me vone se data 1 Korrik 2012, OST do të alokojë kapacitetet mbi bazën e ankandit mujor. Jo me vone se data 1 korrik 2012, OST do të ketë kryer ankandin për periudhën e mbetur të vitit 2012. Për

periudhën që nga data 1 Janar 2013 OST do te kryej ankande vjetore për alokimin e kapaciteteve te interkonjeksioneve.

4. Drejtoria Juridike dhe Mbrojtjes së Konsumatorit të njoftojë shoqërinë OST sh.a, KESH sh.a CEZ Shpenrdarje sh.a, dhe AEES për vendimin e Bordit të Komisionerëve.

Ky vendim hyn në fuqi menjëherë.

Ky vendim botohet në Fletoren Zyrtare.

**KRYETARI**  
**Sokol RAMADANI**